



Inatsisartunut ilaasortat Siverth K. Heilmann, Knud Kristiansen
ATASSUT

**§ 36, immikkoortoq 1 malillugu Naalakkersuisunut apeqquteqaat pillugu:
Innarluutillit inersimasut, namminneq angerlarsimaffillit, imaluunniit
angajoqqaami namminneq illu pigisaanni illuanni inimik attartorlutik
ineqarsinnaanerannut ikiorsiissutit, tapiissutillu sooq atuutsinneqarneq ajorpat?**

2.november 2010
Sagsnr. 2010-040203
Dok. Nr. 495669

Innarluutillit inersimasut pisortanit ikiorneqarnissamik taperneqarnissamillu periarfissaat pillugit apeqquteqaammut qujanaq. Apeqquteqaat isumaga malillugu marluinngorlugu qimerloorneqarsinnaavoq, aappaa pisortanit ikiorneqarnissamik periarfissanut tunngasuvoq, aappaalu inigisamut akiliutinut pisortanit ikiorneqarsinnaanermut periarfissanut attuumassuteqarluni.

Postboks 260
3900 Nuuk
Tlf. (+299) 34 50 00
Fax (+299) 34 66 66
E-mail: in@nanoq.gl
www.nanoq.gl

Aallarniutigalugu naqissusertariaqarpoq, innuttaasut tamarmik, inersimasut innarluutillit ilanngullugit piumasaqaataasut naammassisimagunikkut pisortanit ikiorneqarnissaminut periarfissaqarmata.

Pisortanit ikiorsiissutit pillugit Inatsisartut peqqussutaat nr. 15, 20. november 2006-imeersoq malillugu ikiorsiissutinik pissagaanni, qinnuteqartoq inooqatigiinnermi pisimasumik, soorlu nappaammik, erninermik, suliffissaarunnermik inooqatigiikkunnaarnermilluunniit nalaataqarsimappat, aamma imminut ilaqtutaminillu pilersuinnermut akiligassanullu aalajangersimasunut pisariaqartitaminik pissarsinnaanngippat.

Qinnuteqartoq imatut inissisimassaaq

- suliffissaqanngikkuni suliffissaminillu naammaginartumik neqeroorfigineqarsimanngikkuni pimoorullugulu suliassarsiortuunngikkuni,
- sungiussiniarnermigut ajornartorsiornini, peqqinnginnini assigisaallu pissutigalugit sulisinnaanngitsutut nalilerneqaruni, imaluunniit
- napparsimaguni imaluunniit erninermut atatillugu sulinngiffeqaruni taamalu sulisinnaanani.

Qinnuteqartoq suliffeqanngikkuni, sulilernissamut piareersimasusariaqarpoq

Pilersuinnermut akiligassanullu aalajangersimasunut pisortanit ikiorsiissutisiat annertussusaat missiliuussinikkut aalajangerneqartarpoq, qinnuteqartup maannamut inuuniarnikkut atugarisimasai, pilersuisutut pisussaaffii, katissimallugu aapparisp, nalunaarsorneqarsimasumik aapparisp imaluunniit naligisatut inooqatigisap isertitai, akiligassat aalajangersimasut najukkamilu pissutsit tunngavigalugit.

Taamaallaat pisartagaqartumut taassumalu ilaqtanaanut pisariaqavissutigut pilersornissaannut ikiorsiissutinik tunniussisoqarsinnaavoq aammalu ineqarnermut akiliummut, atuinermut aningaasartuutinut aningaasartuutinullu aalajangersimasunut allanut matussutissanik naleqquttunik.

Tassunga atatillugu oqaatigineqassaaq, inigisamut aningaasartuutit naapertuuttut taamaallaat pisortanit akilerneqartarmata. Inigisamut aningaasartuutit naapertuuttut missingersuutit aalajangersaanermi toqqammavigineqartassaaq, ilaqutariit assigisaanik inoqutigiusut pisortat inissiaataanni attartortittakkani najugallit, taamatut atsigisumik initalimmut akiliutigisartagaat nalinginnaasut. Taamaammat imaassanngilaq ilaqutariit inigisami angisoorsuarmi imaluunniit inuk BSU-mik illumi najugalik, piginneqatigiilluni inissiami imaluunniit nammineq pigisatut inissiami najugaqartut akiliunneqartassasut. Pisortanit ikiorsiissutinik tunniussisarnermi isumaavoq ikiorsiissutisup illup tuninerani akiligassat peereerlugit iluanaaruteqarsinnaanissaa. Kommunalbestyrelsen nammineq naliliiffigisassavaa inigisamut akiliutit naapertuuttut isummerfiginissaat.

Pisortanit ikiorsiissutinik pisartagalik piginneqatigiilluni inissiami imaluunniit nammineq pigisamik inissiami najugalik akiligassanut aalajangersimasunut pisortanit ikiorsiissutinik tunniunneqartut saniatigut aningaaserivimmut atorniartariaqarpoq inissiamut aningaasartuutissat matussuserniarlugit. Taamatut ikiorserneqarnermi pisortanit ikiorsiissutit utertitassat atorniarneqarsinnaanngillat.

Aammattaaq najugaqatigiittuusinnaanerup iluaqutissartai eqqarsaatigineqartassapput. Tamatumani eqqarsaatigineqartoq tassaavoq katissimallutik aappariit inooqatigiillu inigisamut, imermut, innaallagissamut assigisaanullu akiligassanik avitseqatigiissinnaanerat.

Ineqarnermut tapiissutit pillugit periarfissaq pillugit oqaatigineqassaaq, inunnet maninneerlutik ineqartunut imaluunniit angajoqqaamik nammineerlutik najugaanni attartorlutik najugalinnut, ineqarnermut tapiissuteqartoqarneq ajormat, aamma inersimasunut innarluutilinnut.

Inissiani attartortittakkani ineqarnermut tapiissutit pillugit Inatsisartut peqqussutaat nr. 3, 31. maj 2001-imeersoq tunngavigalugu ineqarnermut tapiissutit tunniunneqarsinnaapput inoqutigiinnut inissiani attartortittakkani inissianik attartorneq pillugu Inatsisartut peqqussutaanni pineqartuni najugaqartunut. Oqaatigineqassaaq inissiani attartortittakkani ineqarnermut tapiissutit pillugit inatsisartut peqqussutaannut ilaammata inersimasut meeqqallu inoqutigiit inissiami aalajangersimasumik najugallit tamarmik. Ineqarnermut tapiissutit tunniunneqassapput inoqutigiit akileraaruteqaataasussanik isertitaat inigisamilu meeqqat aalajangersimasumik najugallit amerlassusaat tunngavigalugit.

Neriuppunga naammattumik apeqquteqaatersi akissuteqarfigisimassallugu. Paasissutissanik annertunerusunik pisariaqartitsigussi, ilassuteqarnissannut piareersimavunga.

Ilanngullugu ilisimatitsissutigineqarsinnaavoq, Akileraartarnermut Atugarissaarnermullu ataatsimiititaliarsuup ilaagut isumaginninnermi ikiorsiissutit aamma ineqarnermut ikiorsiissutit sunneqatigiittarnerat misissormassuk. Naalakkersuisut pineqartoq pillugu ataatsimiititaliarsuup misissueqqissaarnera aamma innersuussutaasa tiguinissaat qilanaaraat.

Inussiarnersumik inuulluaqqusillunga



Maliina Abelsen